



UPA 2019/221 – UPA2019/193

11/4-2019

Steen Lyngø

Piniakkat killilersukkat Avannersuarmi Ittoqqortoormiinilu qilalukkat qernertat qaqortallu, aaveq aamma nanoq pillugit periarfissaqarnersoq misissuisoqassasoq, kiisalu sunik suliniutinik killilersuisoqarunnaarnissaa pillugu Naalackersuisut UPA2020-imut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Napätôk', Partii Naleraq)

(Siullermeerneqarnera)

Piniakkanik killilersukkanik ukiumi pisassiiffiusumi Qilalukkanik qernertanik Qilalukkanik qaqortanik aammalu Nannunik, ukiup qaammataani qaammatit marluk December-imi Januar-milu pisassiiffiujunnaartinneqarnissaannik Naalackersuisut peqquneqarnissaannik inatsisartut aaliagiiffigisassaattut siunnersuut.

(Inatsisartunut ilaasortaq Karl-Kristian Kruse, Siumut)

(Siullermeerneqarnera)

Demokraatini siunnersuuteqartut tamaasa qutsavigaagut.

Taakkunani oqallisigisassanngorteqqinneqarpoq qanoq iliorluta nunatsinni pisuussutigut uumassusillit aqussinnaanerigut.

Pinngortitami pissutsit nunarsuup kissakkiartornera iluatigalugu allanngoriartorput. Ullutsinni siku aakkiartorpoq peqataanillu kingusinnerusukkut sikusalorpoq taamatullu aamma peqataanik piniutit ineriartornerat pitsanngoraluttuinnarpoq allannguutillu tamakku pitsaanerusumik periarfissiipput annertunerusumik pisuussutinik uumassusilinnik piniartarnissamut.

Paarlattuanilli tamatta pinngitsoqarata kissaatigigunarparput Kalaallit Nunaata nunanik allanik suleqateqarnerata sakkortusarnerunissaa tamatta aningaasarsiornikkut immitsinnut napatissinnaanerulerniassagatta.

Taamatut nunanik allanik suleqateqarnerulerneq Kalaallit Nunaata iluaqutigissavaa peqataanilli taamatut nunanik allanik suleqateqarnerulernissamut kissaateqarneq aamma pisussaaffiliivoq allanik.

Pisussaaffeqarnerup nassataanik isumagisariaqarparput uangut nuanut pisuussutinik uumassusilinnik aqutsissasugut piujuaannartitsineq anersaaralugu akisussaassuseqarlutalu.

Kalaallit Nunaata ullutsinni nunanik allanik niueqateqarnerani tunngaviuvoq pisuussutinik uumassusilinnik atuineq. Taamaattumik nunarput angisuumik akisussaaffeqarpoq nunarsuarmioqatigiinnut takutissallugu pisuussutitta uumassusillit piujuaannartitsineq tunngavigalugu aqunnissaannut sapinngitsugut aamma akisussaassusilimmik tunngaveqarluta.



Maannakkut silap kissakkiartornera pissutigalugu piniarnissamut periarfissarissaarnerulermat tupinnangilaq piniartut ullumimut naleqqiullugu annerusumik piniarnissaminnut periarfissaqalerumammata. Pingaaruteqarporli nunanut mianersuutigiusagatsigu periarfissarissaarnerulernissaq imaattariaqangimmat piniagassat amerlanerulersimasut tamannalu uppernarsarneqartoq sikup avasinnerulerneratigut.

Kialluunniimmi assortorsinnaangilaa, piniagassanut qularnangitsumik iluaqutaasumik, pingortitap namminermt illersuutaa tassaasimammata siku illersuutillu tamatuma piniagassat ingerlaavartumik periarfissaqartissimavai erniortuarnissaannut taamaasillunilu piniarneq peqassutsimut annerusumik innarliisimanani.

Soorunami pingortitap nammineq illersuutaa siku minnerulerpat, taava assortorneqarsinnaangilaq, piniarnerulernerup naggataatigut kingunerissammagu piniagassat amerlassusaasa ulorinaartorsiortinneqalersinnaanerat.

Taamaattumik pingaartorujussuuvoq piniagassanik aqutsinitsinni taamaallaat tunngavigineqassanngimmat, piniagassat amerlineqartassasut piniarfissat annertusiartornerat iluatigalugu. Aqutsinitsinni tunngaviussaaq peqassutsimut ilisimasagut. Taamaattumik Demokraatini aammaarluta Naalakkersuisunut kaammattussavagut suleqatigeeriaaseq PISUNA alleqqullugu, tassani Pingortitaleriffik aamma najukkami aalisartut piniartullu suleqatigiipput pisuussutit uumassusillit aqunneranni tassunga ilaalluni Kalaallit Nunaanni sumiikkaluaraanniluunniit pisuussutinik uumassusilinnik nalunaarsuisarnissaq.

Peqataanillu Demokraatiniit, nunarsuarmioqatigiinni nalignnaasumik pisassiisarneq pillugu Naalakkersuisut suleqataanerannut atatillugu aammaarluta kaammattussavagut, Kalaallit Nunaata pisuussutinik uumassusilinnik pitsaanerpaamik atuisinnaatitaanissaata naqissuserneqarnissaa ilungersuutigissagaat. Tassanili pisariaqarpoq imminnut nakkutiginnissaq aamma pitsaasumik ataavartumillu pisuussutinik uumassusilinnik nalunaarsuisarnissaq.

Taamatut oqaaseqarluta Demokraatini siunnersuutit taamatut oqaasertalerneqarsimagallartillugit akuerisinnaangilagut taamaakkaluartorli immikkoortut ataatsimiititaliamut suliassanngortikkusuppagut paasinaqqullugu Inatsisartuni qanoq iliorluta sulissutigilersinnaaneripput, pisuussusutinik uumassusilinnik atuinerup naammattumik illersorneqarsinnaasumillu kiisalu pitsaanerpaamik sulissutigineqalernissaa qanoq iliorluta isumagisinnaaneripput.